

Morning Dogri (NSD) National News Bulletin 30-07-2024

आकाशवाणी

खबरां पूजा वजीर कोला।

1. प्रधानमंत्री नरेन्द्र मोदी होर अज्ज नमीं दिल्ली च केन्द्रीस बजट 2024–25 दे परैत विकसित भारत आली बक्खी यात्रा दे उद्घाटन सत्र गी संबोधत करगंन।
2. क्वाड दे विदेश मंत्रिण दे संयुक्त राष्ट्र सूचिबद्ध आतंकवादी समूहें खलाफ अंतराष्ट्रीय कारवाई दा आह्वान कीता ऐ।
3. दिल्ली दे उपराज्यपाल होरें आईएस कोचिंग केन्द्र च हाड़ दी घटना च जान गोआने आले छात्रें दे परोआरें गी 10 लक्ख रपे दी माली मदाद दी घोषणा कीती ऐ।
4. जिया रॉय अंग्रेजी चैनल गी इक्कले पार करने आली दुनिया दी सब्बने शा घट्ट उमर दी ते सब्बने शा तेज महिला पैरा तैराक बनी गई ऐ।
5. अज्ज बडलै 1 जहार 477 श्री अमरनाथ श्रद्धालुणं दा इक होर जत्था कश्मीर घाटी लेई रवाना होआ।

<><><><><><>

PM

प्रधानमंत्री नरेन्द्र मोदी होर अज्ज नमीं दिल्ली च केन्द्रीय बजट 2024–25 दे परैत आले सम्मेलन “विकसित भारत आली बक्खी यात्रा” दे उद्घाटन सत्र गी संबोधन करगंन। सम्मेलन दा आयोजन भारतीय उद्योग परिसंघ–सीआईआई आस्सेआ कीता जा’रदा ऐ। एहदा उद्देश्य विकास लेई सरकार दे व्यापक दृष्टिकरण ते इस लक्ष्य च उद्योग दी भूमका दी रूपरेखा तैआर करना ऐ, एहदे च उद्योग सरकार राजनयिक समुदाय सने 1 जहार शा मते प्रतिभागी हिस्सा लैंगन।

<><><><><><>

QUAD

क्वाड मुख्खें दे विदेश मंत्रिणं नमीं तकनालोजी दा इस्तेमाल करने आले आतंकवादिणं गी चेतावनी दिंदे होई लश्करे तैयबा, जैशे मोहम्मद, अल-कायदा ते इस्लामिक स्टेट सनें संयुक्त राष्ट्र आस्सेआ सूचि बद्ध कीते जेह्दे आतंकवादी गुटें खलाफ अंतर्राष्ट्रीय कारवाई दी मंग कीती ऐ। टोकयो च कल बैठक मगरा सांझे ब्यानै च क्वाड मुख्खें दे विदेश मंत्रिणं आखेआ ऐ जे ओह् आतंकवादी मकसद आस्तै नमीं ते उभरदी तकनालोजी दे इस्तेमाल करी संभावित खतरे प्रति अंतर्राष्ट्रीय ते क्षेत्रीय साझेदारें कन्नै रलियै कम्म करने आस्तै वचनबद्ध ऐ। विदेश मंत्री डॉ. एस.जयशंकर अमरीका दे विदेश मंत्री एंटनर ब्लिंकन ते आस्ट्रेलिया दे विदेश मंत्री पेनी वॉग याको कामी-कावा होरें संयुक्त राष्ट्र आस्सेआ सूचि बद्ध कीते गेदे सारे आतंकवादी गुटें खलाफ इक जुट होइयै कारवाई करने दा आह्वान कीता।

<><><><><><>

RS-Udan

देश च कुल 579 रस्ते 85 हवाई अड्डे कन्नै जुड़े दे न जिंदे च 13 हैलीपेड ते 2 एरोड्रोम्स शामिल न, उड़ान स्कीम हेठ कम्म करा'रदे न। एह गल्ल हवाईबाजी मंत्री मुरलीधर मोहोल होरें राज्यसभा च इक लिखित परते च दस्सी। मंत्री होरें आखेआ जे देश च 21 ग्रीनफील्ड हवाई अड्डे दी स्थापना आस्तै केन्द्र सरकार थमां मंजूरी मिली चुकी दी ऐ, जिंदे चा 12 हवाई अड्डेपिछले 10 ब'रें च कम्म करा'रदे न।

<><><><><><>

Delhi-LG

दिल्ली दे उपराज्यपाल वी.के.सक्सेना होरें नमीं दिल्ली च आईएस कोचिंग संस्थान च पानी भरोचने दी घटना जान गोआने आले छात्रें दे परोआरें गी 10 लक्ख रुपे दी माली मदाद दी घोशणा कीती ऐ। जंदे शनिवारें दिल्ली दे ओल्ड राजेन्द्र नगर दे इक कोचिंग संस्थान दे बेसमेंट च पानी भरोची जाने करी आईएस दी परीक्षा दी तैआर करने आले 3 विद्यार्थिणं दी मौत होइ गई ही।

<><><><><><>

Bhupendra Yadav

पर्यावरण, वन ते जलवायु बदलाव दे केन्द्री मंत्री भूपेन्द्र यादव होरें आईआईटी दिल्ली च कल उत्पाद ते सेवा दे सरबंघ च विचार ते नमीं तकनीकी सोच गी साददा दित्ता ऐ जेह्दे कन्नै पर्यावरण दे हित आली जीवन शैली दे विकास आस्तै बर्ताव च बदलाव आन्नेआ जाई सकै। उनें विद्यार्थिऐं, शोधकर्ताऐं ते अध्यापकें गी नमीं सोच पर कम्म करने आस्तै आखेआ ऐ जेह्दे कन्नै सेही ते सोच-समझ कन्नै संसाधने दे इस्तेमाल आस्तै प्रधानमंत्री नरेन्द्र मोदी हुंदे धेइयै गी पूरा करने आस्तै कम्म कीता जाई सकै। इस कार्यक्रम च अपने संबोधन च यादव होरें आखेआ जे इस पैहल दा मकसद विद्यार्थिऐं, अध्यापकें ते शोधकर्ताऐं थमां वैश्विक कोशश मिशन लाईफ आस्तै नमें बचार हासल करना ऐ। उनें आखेआ जे इक अंतर्राष्ट्रीय मुहिम कन्नै जुड़ने दा एह सुनेहरा मौका सारे इच्छुक लोकें आस्तै उपलब्ध ऐ ते लोक Idea4Life.nic.in पर अपने बचार भेजी सकदे न।

<><><><><><>

Jharkand

झारखंड च चक्रधरपुर मंडल दे तैहत पोदोबेड़ा गां दे नेड़े बडाबम्बो ते खरसावा रेलवे स्टेशन दे बश्कार अज्ज बडलै हावड़ा-मुंबई मेल दी 18 बोगिएं दे पटरी शा उतरने दी घटना च केई यात्रिएं दे घायल होने दी खबर ऐ। एह रेल हावड़ा थमां मुंबई दे छत्रपति शिवाजी टर्मिनल जा'रदी ही। रेलवे दे इक वरिष्ठ अधिकारी नै गलाया ऐ जे घायल यात्रिएं गी इलाज लेई अस्पताल पजाया गेआ ऐ। हादसे आली थाहर उप्पर इक राहत ट्रेन पुज्जी गेई ऐ ते राहत ते बचाह कम्म जारी ऐ। रेलवे नै टाटानगर लेई हैल्पलाइन नंबर 06572290324 चक्रधरपुर लेई, 06587238072 राउरकेला लेई, 0661250172, 06612500244 रांची लेई, 0651278711 ते हावड़ा लेई 03326382217 हैल्पलाइन नंबर जारी कीते न।

<><><><><><>

Lok Sabha

मुख्यै च इसलै स्टार्टअप्स दी गिनतरी 1 लख 40 जहार होई गेदी ऐ। कल लोकसभा च सुआलें दे इलिखित परते च हुनर विकास ते उद्यमिता मंत्री जयंत चौधरी होरें आखेआ जे मानता प्राप्त स्टार्टअप्स नै 15 लख प्रत्यक्ष रोजगार पैदा कीते न। उनें आखेआ सरकार नै 2016 ब'रे च स्टार्टअप इंडिया पैहलकदमी शुरू कीती ही, जेह्दा मकसद मुख्यै च पूंजीनिवेश

गी बधाने ते नमिएं तकनीकें दा इस्तेमाल करियै इक तगड़ी बवस्था ते माहौल तैआर करना हा।

<><><><><><>

New Olympics

अज्ज पैहिरस ओलंपिक च 10 मीटर एयर पिस्टल मिक्सड टीम मकाबले च भारत दी नशानेबाजी मनु भाकर ते सरबजोत सिंह होरें भारत गी दुआ तगमा दोआने आस्तै मैदान च होंगन। दौनें खडारिएं 10 मीटर एयर पिस्टल मिक्सड टीम मकाबले दे कैह दे तगमे आस्तै अपनी थाहर पक्की करी लैती ऐ। अज्ज इंदा मकाबला दक्खन कोरिया दी ओ ये जिन ते ली वोन्हो कन्नै भारती समें मताबक दपैहरी 1 बजे होग। इक पूल-बी मैच भारती हॉकी टीम नै अर्जेंटीना कन्नै 1-1 अंक हासल कीते न। भारती टीम दा अगला मकाबला आयरलैंड कन्नै होग। भारती बैडमिंटन दे मुख्य खडारी लक्ष्य सेन नै पैरिस ओलंपिक च मर्दे दे एकल ग्रुप-एल मैच बैल्जियम दे जूलियन केरेजी गी सिद्धे सैटें च 21-19, 21-14 कन्नै हराइयै अपनी पैहली जित्त हासल कीती। कल फाइनल ग्रुप मैच च लक्ष्य सेना दा मकाबला एशिया चैंपियन जोनातन क्रिस्टी कन्नै होग। मर्दे दे डबल्स मकाबले च सात्विक साईराज रैंक रेड्डी ते चिराग शेट्टी दी जोड़ी नै क्वार्टर फाइनल च अपनी थाहर पक्की करी लैती ऐ। एह दवै खडारी ओलंपिक दे क्वार्टर फाइनल च पुज्जने आले भारत दी पैहली जोड़ी बनी गे न। भारती दी तीरंदाजी टीम जेहदे च धिराज बोम्मादेवारा, तरुणदीप राय ते प्रवीन जाधव क्वार्टर फाइनल च तुर्कीय थमां हारी गे।

<><><><><><>

India-Srilanka T-20

श्रीलंका खलाफ टी-20 त्रै मैचे दी श्रृंखला च बढ़त हासल करदे होई भारती टीम त्रीए ते खीरी मकाबले आस्तै तैआर ऐ। एह मैच अज्ज भारती समें मताबक 7 बजे शुरू होग। एह मैच श्रीलंका च पालेकेले अंतर्राष्ट्रीय क्रिकेट स्टेडियम च होग। दुए टी-20 मैच च भारती ओम नै नमें कप्तान सूर्य कुमार यादव हुंदी अगुवाई च जित्त हासल कीती ही। श्रृंखला च पैहले गै बढ़त बनांदे होई भारत दी टीम दा मकसद फाइनल मैच जित्तियै श्रृंखला 3-0 कन्नै अपने नां करना ऐ।



Para Swimmer

पैरा तैराक जिया राय अंग्रेजी चैनल गी सफलतापूर्वक इक्कले पार करने आली दुनिया दी सब्बने शा घट्ट उमरी दी सब्बने शा तेज महिला पैरा तैराक बनी गेइ ऐ। 16 ब'रें दी जिया नै ऐतवार ते सोमवार इंगलैंड च एबॉट्स विलफ थमां फ्रांस दे प्वाइंट डे ला कोर्टे दून तगर 34 किलोमीटर दी दूरी 17 घेंटे ते 25 मिंटे च तैह कीती। ओह खुल्ले पानी च तैराकी च विश्व रिकार्ड दे कन्नै इक अंतराष्ट्रीय ओपन वॉटर तैराक बी हैन। विकलांगता दे बावजूद उंदे ना केई अंतराष्ट्रीय ते राष्ट्रीय पुरस्कार न, जिंदे च प्रधानमंत्री राष्ट्रीय बाल पुरस्कार पीएमबी-2022 बी शामिल ऐ, जेहड़ा जे 18 ब'रें शा घट्ट उमर दे नागरिकें लेई सर्वोच्च पुरस्कार ऐ। जिया राय मुंबई दी रौहने आलियां न।



Amarnath Yatra

अज्ज श्री अमरनाथ यात्रिणं दा नमां जत्था 1 ज्हार 777 श्रद्धालुएं सनें जम्मू दे भगवती नगर यात्री निवास बेस कैंप थमां श्री अमरनाथ जी दे दर्शन आस्तै कश्मीर घाटी रवाना होआ। 52 गड्डिडएं च सुआर होइयै 1 ज्हार 142 मर्द, 254 महिलां, 3 न्याणे, 66 साधु ते 12 साध्वियां शामिल हियां। इंदे चा 377 श्रद्धालु बालटाल बेस कैंप आस्तै ते 11 सौ श्रद्धालु पहलगाम बेस कैंप आस्तै बडलै मुंह न्हरे 3 बज्जियै 25 मिंटे पर श्री बाबा बर्फानी दे दर्शन आस्तै अगड़े बधे।



IMD

भारतीय मौसम विभाग नै अगले 3-4 दिनें लेई उत्तर-पच्छिम भारत दे अधिकांश हिस्सें सक्रिय मानसून दी स्थिति दा अनुमान लाया ऐ। मौसम विभाग मूजब मानसून सक्रिय ऐ ते समुंद्र तल उप्पर अपनी सामान्य स्थिति दे दक्खन च ऐ ते अगले 3-4 दिनें दरान बल्ले-बल्ले उत्तर आली बक्खी जाने दी मेद ऐ। सक्रिय मानसून करी अगले चऊं दिनें च हिमाचल प्रदेश, उत्तराखंड, जम्मू कश्मीर, लद्दाख, गिलगित, बलितस्तान, मुज्जफराबाद, पंजाब, हरियाणा, चंडीगढ़, दिल्ली, उत्तर प्रदेश ते पच्छिम राजस्थान च भारी बरखा दी मेद ऐ। मौसम विभाग नै

अगले किश दिनें च पच्छम—मध्य—दक्खन प्रायद्वीपें, पूर्व ते पूर्वोत्तर भारत दे किश थाहरें भारी बरखा दा अनुमान जताया ऐ। मुत्तलका विभाग नै सौराष्ट्र, कच्छ, कोंकण, गोवा, मध्य प्रदेश, महाराष्ट्र, छत्तीसगढ़, कर्नाटक, नागालैंड, मणिपुर, मिजोरम, त्रिपुरा, अरुणाचल प्रदेश, ओडिशा च अगले म्हीने दी 2 तरीक तगर भारी बरखा दी पेशगोई कीती ऐ।

<><><><><><>